



۹- بر چاناق قلعه شهیدی حسن ادهمک والده سنه صوگ مکتوبی

والده جگم، درت عسکر طوغورمقله مفتخر
شانلی تورک آنه سی!

نصیحت آمیز مکتوبگی، دیورین اووه سی کی
کوزل، یشیلک بر اووه جغک اورتہ سندن کچن
دره نڭ کنارنده کی آرمود آغاچنڭ سایه سنده
اوتورورکن آلدیم. طبیعتڭ یشیلکلری ایچنده
مست اولمش روحمی بر قات داها تقویه ایتدی.
اوقودم، اوقودقجه بیوک بیوک درس لر آلدیم. تکرار
اوقودم. شویله کوزل و مقدس بر وظیفه نڭ ایچنده
بولوندیغمدن سویندم. کوزلریمی آچدم. اوزاقلره
طوغری باقدم. یشیل یشیل اکیملرڭ روزکاره
مقاومت ایده مه یه رک اگیلمسی بڭا، آنه مدن کلن
مکتوبی سلاملا یور کی کلدی. هپسی بدن طرفه
طوغری اگیلوب قالقیوردی و بنی، آنه مدن
مکتوب کلدی دیه رک تبریک ایدیوردی.
کوزلریمی براز صاغه چویردم؛ کوزل بر یاماچڭ
اٹکلرنده کی محتشم چام آغاچلری کندیلرینه
مخصوص بر صدا ایله بنی تبشیر ایدیورلردی.
نظرلریمی صوله چویردم؛ چیغیل چیغیل آقان دره،
بڭا والده مدن گلن مکتوبدن طولای کولویور،
اوینایور، کوپورویوردی... باشمی قالدیردم،
گولکه سنده استراحت ایتدیگم آغاچڭ یاپراقلرینه
باقدم؛ هپسی بنم سوینجمه اشتراک ایتدیگنی، یاپدقلری
رقصلرله آڭلاتمق ایسته یوردی. دیگر بر دالنه باقدم؛
کوزل بر بلبل، طاتلی صدایله بنی تبشیر ایدیور و

